

նախագիծ 2
արձանագրային

**«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔԱՂԱՔԱՑԻԱԿԱՆ ԴԱՏԱՎԱՐՈՒԹՅԱՆ
ՕՐԵՆՍԳՐՔՈՒՄ ԼՐԱՑՈՒՄ ԿԱՏԱՐԵԼՈՒ ՄԱՍԻՆ» ՀԱՅԱՍՏԱՆԻ
ՀԱՆՐԱՊԵՏՈՒԹՅԱՆ ՕՐԵՆՔԻ ՆԱԽԱԳԻԾԻ ՎԵՐԱԲԵՐՅԱԼ**

Հավանություն տալ «Հայաստանի Հանրապետության քաղաքացիական դատավարության օրենսգրքում լրացում կատարելու մասին» Հայաստանի Հանրապետության օրենքի նախագծին և այն սահմանված կարգով ներկայացնել ՀՀ Ազգային ժողով:

Հ. Թովմասյան

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՕՐԵՆՔԸ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔԱՂԱՔԱՑԻԱԿԱՆ ԴԱՏԱՎԱՐՈՒԹՅԱՆ
ՕՐԵՆՍԳՐՔՈՒՄ ԼՐԱՑՈՒՄ ԿԱՏԱՐԵԼՈՒ ՄԱՍԻՆ

Հոդված 1. Հայաստանի Հանրապետության 1998 թվականի հունիսի 17-ի Հայաստանի Հանրապետության քաղաքացիական դատավարության օրենսգիրքը լրացնել նոր 128.1-րդ հոդվածով՝ հետևյալ բովանդակությամբ.

«Հոդված 128.1 Առևտրային կազմակերպությունների միջև քաղաքացիաիրավական պայմանագրերից բխող վեճերի արագացված դատաքննությունը

1. Առևտրային կազմակերպությունների միջև քաղաքացիաիրավական պայմանագրերից բխող վեճերի դեպքում դատարանը կիրառում է արագացված դատաքննություն, եթե պահանջը հիմնված է գրավոր գործարքի և անվիճելի իրավունքի վրա:

2. Սույն հոդվածի 1-ին մասով նախատեսված դեպքերում դատարանը կայացնում է որոշում արագացված դատաքննություն կիրառելու մասին:

3. Դատարանը որոշում է կայացնում առևտրային կազմակերպությունների միջև քաղաքացիաիրավական պայմանագրերից բխող վեճերի արագացված դատաքննություն կիրառելու որոշումը վերացնելու մասին, եթե կողմերի միջև ծագել է վեճ իրավունքի մասին և առաջացել է գործի լուծման համար էական նշանակություն ունեցող փաստերի ապացուցման համար ապացույցներ ձեռք բերելու կամ գործի քննության ժամանակ ծագող հատուկ գիտելիքներ պահանջող հարցերի պարզաբանման նպատակով փորձաքննություն նշանակելու անհրաժեշտություն:»:

4. Սույն հոդվածի 1-ին մասով նախատեսված դեպքերում դատարանն անհապաղ կայացնում է վճիռ:»:

Հոդված 2. Սույն օրենքն ուժի մեջ է մտնում պաշտոնական հրապարակման օրվան հաջորդող տասներորդ օրը:

Հ Ի Մ Ն Ա Վ Ո Ր Ո Ւ Մ

«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔԱՂԱՔԱՑԻԱԿԱՆ ԴԱՏԱՎԱՐՈՒԹՅԱՆ ՕՐԵՆՍԳՐՔՈՒՄ ԼՐԱՑՈՒՄ ԿԱՏԱՐԵԼՈՒ ՄԱՍԻՆ» ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՔԻ ԸՆԴՈՒՆՄԱՆ

Ընթացիկ իրավիճակը և առկա խնդիրները.

Ներկայումս Հայաստանի Հանրապետության քաղաքացիական դատավարության օրենսգրքով ինքնուրույն կարգավորում չեն ստացել առևտրային կազմակերպությունների միջև ծագող վեճերի լուծման ընթացակարգերը: Խնդիրն այն է, որ առևտրային կազմակերպությունների միջև ծագող վեճերը, որպես կանոն, լինում են կողմերի միջև կնքված գրավոր գործարքներից բխող, ուստի ապացուցման և դատավարական գործողությունների կատարման անհրաժեշտությունը գրեթե բացակայում է: Մինչդեռ նման դեպքերում ևս համապատասխան վեճերը դատարանում քննվում են ընդհանուր ընթացակարգերով, ինչը ոչ միայն զգալիորեն ծանրաբեռնում է դատարանների աշխատանքը, այլ նաև անհարկի հետաձգում է ոչ բարդ և ոչ ծավալուն գործերի լուծման և կողմերի խախտված իրավունքների վերականգնման ժամկետները:

Առաջարկվող լուծումները.

Նախագծով նախատեսվում է Հայաստանի Հանրապետության քաղաքացիական դատավարության օրենսգրքով ինքնուրույն կարգավորման ենթարկել առևտրային կազմակերպությունների միջև ծագող վեճերի լուծման ընթացակարգերը, մասնավորապես նախատեսվում է, որ նշված դեպքերում դատարանը կիրառում է արագացված դատաքննություն, եթե պահանջը հիմնված է գրավոր գործարքի և անվիճելի իրավունքի վրա: Կարգավորման է ենթարկվում նաև առևտրային կազմակերպությունների միջև ծագող վեճերի լուծման դեպքում դատարանի կողմից կայացված արագացված դատաքննություն կիրառելու որոշումը վերացնելու հետ կապված հարաբերությունները, մասնավորապես սահմանվում է, որ դատարանը որոշում է կայացնում առևտրային կազմակերպությունների միջև քաղաքացիաիրավական պայմանագրերից բխող վեճերի արագացված դատաքննություն կիրառելու որոշումը վերացնելու մասին, եթե կողմերի միջև ծագել է

վեճ իրավունքի մասին և առաջացել է գործի լուծման համար էական նշանակություն ունեցող փաստերի ապացուցման համար ապացույցներ ձեռք բերելու կամ գործի քննության ժամանակ ծագող հատուկ գիտելիքներ պահանջող հարցերի պարզաբանման նպատակով փորձաքննություն նշանակելու անհրաժեշտություն:

Ակնկալվող արդյունք.

Նախագծի ընդունման արդյունքում ակնկալվում է արագացված դատաքննության միջոցով հնարավորինս պարզեցնել առևտրային կազմակերպությունների միջև քաղաքացիաիրավական պայմանագրերից բխող վեճերի լուծման ընթացակարգերը և առավել սեղմ ժամկետներում վերականգնել համապատասխան կազմակերպությունների իրավունքներն ու նպաստել վերջիններիս բնականոն գործունեության ապահովմանը:

ՏԵՂԵԿԱՆՔ

**«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔԱՂԱՔԱՑԻԱԿԱՆ ԴԱՏԱՎԱՐՈՒԹՅԱՆ
ՕՐԵՆՍԳՐՔՈՒՄ ԼՐԱՑՈՒՄ ԿԱՏԱՐԵԼՈՒ ՄԱՍԻՆ» ՀԱՅԱՍՏԱՆԻ
ՀԱՆՐԱՊԵՏՈՒԹՅԱՆ ՕՐԵՆՔԻ ԸՆԴՈՒՆՄԱՆ ԴԵՊՔՈՒՄ ԱՅԼ ԻՐԱՎԱԿԱՆ
ԱԿՏԵՐՈՒՄ ՓՈՓՈԽՈՒԹՅՈՒՆՆԵՐ ԵՎ ԼՐԱՑՈՒՄՆԵՐ ԿԱՏԱՐԵԼՈՒ
ԱՆՀՐԱԺԵՇՏՈՒԹՅԱՆ ԿԱՄ ԲԱՑԱԿԱՅՈՒԹՅԱՆ ՄԱՍԻՆ**

«Հայաստանի Հանրապետության քաղաքացիական դատավարության օրենսգրքում լրացում կատարելու մասին» Հայաստանի Հանրապետության օրենքի ընդունման կապակցությամբ Հայաստանի Հանրապետության այլ իրավական ակտերի ընդունման անհրաժեշտություն չի առաջանում, և այն համապատասխանում է միջազգային պայմանագրերով ստանձնած պարտավորություններին:

ՏԵՂԵԿԱՆՔ

**«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔԱՂԱՔԱՑԻԱԿԱՆ ԴԱՏԱՎԱՐՈՒԹՅԱՆ
ՕՐԵՆՍԳՐՔՈՒՄ ԼՐԱՑՈՒՄ ԿԱՏԱՐԵԼՈՒ ՄԱՍԻՆ» ՀԱՅԱՍՏԱՆԻ
ՀԱՆՐԱՊԵՏՈՒԹՅԱՆ ՕՐԵՆՔԻ ԸՆԴՈՒՆՄԱՆ ԴԵՊՔՈՒՄ ՊԵՏԱԿԱՆ ԿԱՄ
ՏԵՂԱԿԱՆ ԻՆՔՆԱԿԱՌԱՎԱՐՄԱՆ ՄԱՐՄՆԻ ԲՅՈՒՋԵՈՒՄ ԾԱԽՍԵՐԻ ԵՎ
ԵԿԱՄՈՒՏՆԵՐԻ ԷԱԿԱՆ ԱՎԵԼԱՑՄԱՆ ԿԱՄ ՆՎԱՋԵՑՄԱՆ ՄԱՍԻՆ**

«Հայաստանի Հանրապետության քաղաքացիական դատավարության օրենսգրքում լրացում կատարելու մասին» Հայաստանի Հանրապետության օրենքի ընդունման դեպքում պետական կամ տեղական ինքնակառավարման մարմնի բյուջեում ծախսերի և եկամուտների էական ավելացում կամ նվազեցում չի առաջանում:

Ա Մ Փ Ո Փ Ա Թ Ե Ր Թ

«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔԱՂԱՔԱՑԻԱԿԱՆ ԴԱՏԱՎԱՐՈՒԹՅԱՆ ՕՐԵՆՍԳՐՔՈՒՄ ԼՐԱՅՈՒՄ ԿԱՏԱՐԵԼՈՒ ՄԱՍԻՆ»
 ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՔԻ ՆԱԽԱԳԾԻ ՎԵՐԱԲԵՐՅԱԼ ԿԱՏԱՐՎԱԾ ԱՌԱՋԱՐԿՈՒԹՅՈՒՆՆԵՐԻ

Առարկության, առաջարկության հեղինակը, գրության ստացման ամսաթիվը, գրության համարը	Առարկության, առաջարկության բովանդակությունը	Եզրակացություն	Կատարված փոփոխություններ
1 Հայաստանի Հանրապետության Ֆինանսների նախարարություն 2011 թվականի մարտի 21-ի թիվ 1/4.1-2/2789-11 գրություն	2 Առաջարկություններ չկան:	3	4